


Ճակատամարտը դեռ չէր լրացած, բայց արդէն ժամը 12 էր, և կռուող կողմերը կանգ առին իրենց գրաւած տեղերում: Պատերազմը վերջանում էր:

Ո՞վ էր յաղթողը այս պատերազմում: Վրացիները պնդում են, որ դեկտ. 31-ի ճակատամարտը վերջացաւ իրենց յաղթանակով: Եթէ պայմանաժամը չլրանար, ասում են նրանք, վրաց զօրքը առաջ կերթար յաղթական, և հայկական բանակի կատարեալ պարտութիւնը կը դառնար անխուսափելի: Ո՛չ, պատասխանում են հայերը, եթէ պայմանաժամը չլրանար, հայ զօրքերը յաջողութեամբ կիրականացնէին շրջափակման ծրագիրը, և զօր. Մազնիևի զօրքերը ամբողջովին դերի կընկնէին հայերի ձեռքը:

Վրացիները ասում են՝ մենք յաղթեցինք, հայերը ասում են՝ մենք յաղթեցինք: Ո՞ւմն է իրաւունքը: Պատասխանը թո՛ղ ռազմադէտները տան. ճակատամարտի դաշտի քարտէսը երկու կողմին էլ հիմք է տալիս մնալու իր համոզման մէջ:

Եւ, իրօք, ուշադրութիւն դարձրէ՛ք ճակատամարտի քարտէսի վրա՝ ուժերի ի՛նչ տարօրինակ դասաւորութիւն: Հայ ու վրացի զօրամասերը խառնել են իրար. վրացիները մտել են շատ խորունկ հայկական շրջանը, հայերը սպառնական՝ անցել են վրացիների թիկունքը: Կը դիմանայի՞ն Կորովկովի զօրամասերը վրացական գրոհին, կը կարողանայի՞ն վրացիները մաքրել թիկունքը հայկական խուժումից. կը կարողանա՞ր Մազնիևը տոկալ Դրօի հարւածին: Այս հարցերը մնում են անպատասխան*):



*) Ինչքան էր մարդկային կորուստը պատերազմում — դժար է ասել: Մեր ձեռքն ընկած պատահական տեղեկութիւններից երևում է, որ միայն 4րդ գնդից սպանել էր 41